

199 pelajar UMS sertai program 'Student Outdoor Challenge' 31 Mei 2003

KOTA KINABALU: Seramai 199 pelajar Program Pengajian Luar Kampus (PPLK) Universiti Malaysia Sabah (UMS) menyertai program *Student Outdoor Challenge* fasa 1 selama dua hari, di Pusat Latihan Outdoor UMS.

Pengarah Program berkenaan, Kolonel (B) Mohd Khairi Zainal Abidin berkata program yang dikelolakan UMS itu adalah julung kali diadakan secara formal dengan membabitkan semua pelajar luar kampus.

Katanya, aktiviti itu bertujuan memupuk semangat kerjasama dan permuafakatan dalam semua aspek di kalangan pelajar supaya mereka dapat meningkatkan ilmu pengetahuan.

Beliau berkata menerusi aktiviti ini juga pelajar berpeluang melatih diri sebagai pemimpin dalam kumpulan seterusnya melahirkan pemikiran baru yang dapat diaplikasikan dalam pendidikan dan kegiatan kokurikulum.

"Menerusi program ini, pelajar akan dapat menerapkan nilai muafakat, bekerjasama, cekal dan berdaya kreatif dalam menyelesaikan masalah yang dihadapi seterusnya memberi mereka peluang mengenali lebih rapat kawan lain," katanya ketika menyampaikan taklimat program kepada peserta di kampus utama UMS, di Likas di sini.

Antara aktiviti lasak yang dijalankan ialah membina rakit dan berkayak; memanjat tembok tinggi; dan menjelajah hutan. Program itu diadakan sebanyak tiga fasa.

Program dua hari itu dijalankan dengan bimbingan kira-kira 10 orang jurulatih utama dan Penyelaras PPLK UMS, Rosle Mohidin.

Sementara itu, beberapa pelajar luar kampus yang menyertai program itu menyifatkan program itu adalah pengalaman baru yang diperoleh oleh mereka.

Seorang pendidik dari Ranau, Roslinda Maisin, 27, berkata program itu mampu meningkatkan keyakinan diri terutama bagi kalangan guru wanita supaya lebih yakin menghadapi cabaran era pendidikan masa kini.

"Ya juga mampu mengikis perasaan takut dan mudah putus asa di kalangan pendidik," katanya.

Seorang guru besar, Arjimin Naing, 44, berkata latihan seperti itu amat penting di kalangan ketua pentadbir sebagai pendorong kepada pendidik dan bakal pendidik supaya lebih bertanggungjawab dan rajin berusaha dalam melaksanakan tugas.